

四庫全書

史部

欽定四庫全書

史部

通志卷一百四十

詳校官編修臣李潢

編修臣裴謙覆勘

覆校官助教臣金學詩

校對官學正臣徐立綱

謄錄監生臣儲夏書

欽定四庫全書

通志卷一百四十一

宋右迪功郎鄭樵漁仲撰

列傳第五十三

梁

沈約子旋范雲孫伯翳韋叡兄纂稜叡子放

裴邃子之禮兄升之高江淹任昉柳

悅從叔慶遠子津津子仲禮敬禮王

志

兄子泰 弟子筠

筠子祥

志弟彬

彬弟

寂 志從子騫

騫子規

騫弟暕

暕子承

承弟訓

志從父

王瑩

子實 瑩從父弟亮

王進之

子清 王

兄瞻

瞻從子籍

王瑩

子實 瑩從父弟亮

王進之

子清 王

份

子琳 錫弟僉

琳子銓

銓弟錫

份從孫克

沈約字休文吳興武康人也伯祖田子晉龍驤將軍始

平太守祖林子宋贈征虜將軍父璞淮南太守林子璞

附田子傳元凶弑立璞以奉迎之晚見殺約時年十三

潛竄山谷會赦乃免既而流寓孤貧篤志好學晝夜不

釋卷母恐其以勞生疾常遣減油滅火而晝之所讀夜

輒誦之遂博通羣籍善屬文濟陽蔡興宗聞其才而善之及為郢州引為安西外兵參軍兼記室興宗常謂其諸子曰沈記室人倫師表宜善師之及為荊州又為征西記室帶關西令齊初為征虜記室帶襄陽令所奉主即齊文惠太子太子入居東宮為步兵校尉管書記直永壽省校四部圖書時東宮多士約特被親遇每旦入見景斜方出時王侯到宮或不得進約每以為言太子曰吾生平懶起是卿所悉得卿談論然後忘寢卿欲我

夙興可恒早入遷太子家令後為司徒右長史黃門侍郎時竟陵王招士約與蘭陵蕭琛琅邪王融陳郡謝朓南郡范雲樂安任昉等皆游焉當世號為得人隆昌元年除吏部郎出為東陽太守齊明帝即位徵為五兵尚書遷國子祭酒明帝崩政歸冢宰尚書令徐孝嗣使約撰定遺詔永元中復為司徒左長史進號征虜將軍南河清太守初武帝在西邸與約舊游建康城平引為驃騎司馬時帝勲業既就天人允屬約嘗叩其端帝默然

不應他日又進曰今與古異不可以淳風期萬物士大夫攀龍附鳳者皆望有尺寸之功以保其福祿今童兒牧豎悉知齊祚之終且天文人事表革運之徵永元以來尤為彰著識云行水中作天子此又歷然在記天心不可違人情不可識帝曰吾方思之約曰公初起兵樊沔此時應思今日王業已就何所復思昔武王伐紂始入人便曰吾君武王不違人意亦無所思公自至京邑已移氣序比於周武遲速不同若不早定大業稽天人

之望脫一人立異便損威德且人非金石時事難保豈
可以建安之封遺之子孫若天子還都公卿在位則君
臣分定無復異圖君明於上臣忠於下豈復有人方更
同公作賊帝然之約出召范雲告之雲對略同約旨帝
曰智者乃爾暗同卿明早將休文更來雲出語約約曰
卿必待我雲許諾而約先期入帝令草其事約乃出懷
中詔書并諸選置帝初無所改俄而雲自外來至殿門
不得入徘徊壽光閣外但云咄咄約出雲問曰何以見

處約舉手向左雲笑曰不乖所望有頃帝召雲謂曰生平與沈休文同居不覺有異人處今日才智縱橫可謂明識雲曰公今知約不異約今知公帝曰我起兵於今三年矣功臣諸將實有其勞然成帝業者乃卿二人也梁臺建為散騎常侍吏部尚書兼右僕射及受禪為尚書僕射封建昌縣侯又拜約母謝為建昌國太夫人奉策之日吏部尚書范雲等二十餘人咸來致拜朝野以為榮俄遷右僕射天監二年遭母憂輿駕親出臨弔以

約年衰不宜致毀遣中書舍人斷客節哭起為鎮軍將軍丹陽尹置佐史服闋遷侍中右光祿大夫領太子詹事奏尚書八條事遷尚書令累表陳讓改授左僕射領中書令尋遷尚書令領太子少傅九年轉左光祿大夫初約久處端揆有志台司論者咸謂為宜而帝終不用乃求外出又不見許與徐勉素善遂以書陳情於勉言已老病百日數旬革帶常應移孔以手握臂率計月小半分欲謝事求歸老之秩勉為言於帝請三司之儀弗

許但加鼓吹而已約性不飲酒少嗜慾雖時遇隆重而居處儉素立宅東田矚望郊阜常為郊居賦以序其事尋加特進遷中軍將軍丹陽尹侍中特進如故十二年卒官年七十三謚曰隱約左目重瞳子腰有紫志聰明過人好墳籍聚書至二萬卷都下無比少孤貧約於宗黨得米數百斛為宗人所侮覆米而去及貴不以為憾用為郡部傅嘗侍宴有妓婢師是齊文惠宮人帝問識坐中客不曰唯識沈家令約伏地流涕帝亦悲焉為之

罷酒約歷仕三代該悉舊章博物洽聞當世取則謝元
暉善為詩任彥昇工於筆約兼而有之然不能過也自
負高才昧以榮利乘時射勢頗累清談及居端揆稍弘
止足每進一官輒殷勤請退而終不能去論者方之山
濤用事十餘年未常有所薦達政之得失唯唯而已初
武帝有憾於張稷及卒因與約言之約曰左僕射出作
邊州刺史已往之事何足復論帝以為約昏家相為怒
約曰卿言如此是忠臣邪乃輦歸內殿約懼不覺帝起

猶坐如初及還未及牀憑空頓於戶下因病夢齊和帝
斂斷其舌召巫視之巫言如夢乃呼道士奏赤章於天
稱禪代之事不由已出先是約嘗侍宴會豫州獻粟徑
寸半帝竒之問粟事多少與約各疏所憶少帝三事約
出謂人曰此公護前不讓即羞死帝以其言不遜欲抵
其罪徐勉固諫乃止及疾上遣主書黃穆之專知省視
穆之夕還增損不即啓聞懼罪竊以赤章事因上省醫
徐奘以聞又積前失帝大怒中使譴責者數焉約懼遂

卒有司謚曰文帝曰懷情不盡曰隱故改為隱約少時
常以晉氏一代竟無全書年二十許便有撰述之意宋
恭始初征西將軍蔡興宗為啓明帝有勅許焉自此踰
二十年所撰之書方就凡一百餘卷條流雖舉而採掇
未周永明初遇盜失第五帙又齊建元四年被勅撰國
史永明二年又兼著作郎撰次起居注五年春又被勅
撰宋書六年二月畢功表上之其所撰國史為齊紀二
十卷天監中又撰梁武紀十四卷又撰邇言十卷謚例

十卷文章志三十卷文集一百卷皆行於世又撰四聲譜以為在昔詞人累千載而不悟而獨得胸襟窮其妙旨自謂入神之作武帝雅不好焉嘗以問周捨曰何謂四聲捨曰天子聖哲是也然帝竟不甚遵用也約子旋字士規襲爵位司徒右長史太子僕以母憂去官因蔬食辟穀服除猶絕粳梁終於南康內史謚曰恭集注邇言行於世旋弟趨字孝鯉亦知名位黃門郎旋卒子實嗣實弟衆列在陳史

范雲字彥龍南鄉舞陰人晉平北將軍汪六世孫也祖
璩之宋中書侍郎雲六歲就其姑夫袁叔明讀毛詩日
誦九紙陳郡殷琰名知人候叔明見之曰公輔才也雲
性機警有識且善屬文下筆輒成時人每疑其宿構父
抗為郢府參軍雲隨在郢時吳興沈約新野庾杲之與
抗同府見而友之起家郢州西曹書佐轉法曹行參軍
俄而沈攸之舉兵圍郢城抗時為府長流入城固守留
家屬居外雲為軍人所得攸之召與語聲色甚厲雲容

貌不變徐自陳說攸之笑曰卿定可兒且出就舍明日
又召雲令送書入城內餉武陵王酒一石犢一頭餉長
史柳世隆鱠魚二十頭皆去其首城內或欲誅雲雲曰
老母弱弟懸命沈氏若其違命禍必及親今日就戮甘
心如齋世隆素與雲善乃免之後除員外散騎郎齊建
元初竟陵王子良為會稽太守雲為府主簿王未之知
後剋日祭秦望山乃命雲雲以山上有秦始皇刻石此
文三句一韻人多作兩句讀之並不得韻又皆大篆人

多不識乃夜取史記讀之令上口明日登山子良令賓僚讀之皆茫然不識末問雲雲曰下官嘗讀史記見此刻石文進乃讀之如流子良大悅因以為上賓自是寵冠府朝子良為丹陽尹雲復為主簿深相親任時進見齊高帝會有獻白鳥帝問此何瑞雲位卑最後答曰臣聞王者敬宗廟則白鳥至時謁廟始畢帝曰卿言是也感應之理一至此乎子良為南徐州南兗州雲並隨府遷每陳朝政得失於子良尋除尚書殿中郎子良為雲

求祿齊武帝曰聞范雲諂事汝政當流之子良對曰雲之事臣動相箴諫諫書存者百有餘紙帝索視之言皆切至咨嗟良久曰不意范雲乃爾方令弼汝子良為司徒又補記室時巴東王子響在荊州殺上佐都下凶凶人多異志而豫章王嶷鎮東府多還私邸動移旬日子良築第西郊游戲而已武帝時為南郡王文學與雲俱為子良所禮武帝勸子良還石頭并言大司馬宜還東府子良不納武帝以告雲時廷尉平王植為齊武帝所

狎雲謂植曰西夏不靜人情甚惡大司馬詎得久還私第司徒亦宜鎮石頭鄉入既數言之差易植因求雲作啓自呈之俄而二王各鎮一城文惠太子嘗幸東田觀穫稻雲時從文惠顧雲曰此刈甚快雲曰三時之務亦甚勤勞願殿中知稼穡之艱難無徇一朝之宴逸也文惠改容謝之及出侍中蕭緬先不相識就車握雲手曰不謂今日復見謹言永明十年使魏魏人李彪宣命至雲所甚見稱美彪為設甘蔗黃甘粽隨盡絕益彪笑謂

曰范散騎小復儉之一盡不可復得使還再選零陵內
史初零陵舊政公田奉米之外別雜調四十石及雲至
郡上其半百姓悅之深為齊明帝所知還除正員郎時
高武王侯並懼大禍雲因帝召次曰昔太宰文宣王語
臣言嘗夢在一高山上上有一深阮見文惠太子先墜
次武帝次文宣望見僕射在室坐御牀備王者羽儀不
知此是何夢卿勿向人道明帝流涕曰文宣此惠亦難
負於是處昭曹兄弟異於餘宗室雲之幸於子良江祐

求雲女昏姻酒酣巾箱中取剪刀與雲曰且以為聘雲
笑受之至是柘貴雲又因酣曰昔與將軍俱為黃鵠今
將軍化為鳳凰荆布之室理隔華盛因出剪刀還之柘
亦更姻他族及柘敗妻子流離每相經理又為始興內
史舊郡界得亡奴婢悉付作部曲即貨去買銀輸官雲
乃先聽百姓誌之若百日無主依判送臺又郡相承後
堂有雜工作雲悉省還役並為明帝所賞郡多豪猾大
姓二千石有不善者輒共殺害不則逐之邊帶蠻俚尤

多盜賊前內史皆以兵刃自衛雲入境撫以恩德罷亭
候商賈露宿郡中稱為神明遷廣州刺史平越中郎將
至任遣使祭孝子南海羅威唐頌蒼梧丁密頊琦等墓
時江柘姨弟徐藝為曲江令柘深以託雲有譚儼者縣
之豪族藝鞭之儼以為恥至都訴雲雲坐徵還下獄會
赦免初武帝為司徒祭酒與雲俱在竟陵王西邸情好
歡甚永明末武帝與兄懿卜居東郊之外雲亦築室相
依武帝每至雲所其妻嘗聞蹕聲又常與武帝同宿顧

嵩之舍嵩之妻方產有鬼在外曰此中有王有相雲起
曰王當仰屬相以見歸因是盡心推事及帝起兵將至
都雲雖無官自以與帝素款慮為昏主所疑將來入城
先以車迎太原孫伯翳謀之伯翳曰今天文顯於上災
變應於下蕭征東以濟世雄武挾天子以令諸侯天時
人事寧俟多說雲曰此政會吾心今羽翮未備不得不
就籠檻希足下善聽之及入城除國子博士未拜而東
昏遇弒侍中張稷使雲銜命至石頭武帝恩待如舊遂

參讚謨謀毗佐大業仍拜黃門侍郎與沈約同心翊贊
俄遷大司馬諮議參軍領錄事梁臺建遷侍中武帝時
納齊東昏余妃頗妨政事雲嘗以為言未之納後與王
茂同入卧内雲又諫王茂因起拜曰范雲言是公必以
天下為念無宜留惜帝默然雲便䟽令以余氏賚茂帝
賢其意而許之明日賜雲茂錢各百萬及帝受禪柴燎
南郊雲以侍中參乘禮畢帝升輦謂雲曰朕之今日所
謂慄乎若朽索之馭六馬雲對曰亦願陛下日慎一日

帝善其言即日遷散騎常侍吏部尚書以佐命功封霄
城縣侯雲以舊恩超居佐命盡誠翊亮知無不為帝亦
推心仗之所奏多允雲本大武帝十三歲嘗侍宴帝謂
臨川王宏鄱陽王恢曰我與范尚書少親善申四海之
敬今為天下主此禮既革汝宜代我呼范為兄二王下
席拜與雲同車還尚書下省時人榮之帝嘗與雲言及
舊事云朕司州還在三橋宅門生王道牽衣云聞外述
圖讖云齊祚不久別應有王者官應取富貴朕齋中坐

讀書內感其言而外迹不得無怪欲呼人縛之道叩頭
求哀乃不敢復言今道為羽林監文德主帥知管籥雲
曰此乃天意令道發耳帝又云布衣時嘗夢拜兩舊妾
為六宮今有天下此嫗已卒所拜非復其人恒以為恨
其年雲以本官領太子中庶子二年遷尚書右僕射猶
領吏部頃之坐違詔用人免吏部猶為右僕射雲性篤
時事寡嫂盡禮家事必先諮而後行好節尚竒專趨人
之急少與領軍長史王暉善雲起宅新成移家始畢暉

亡於官舍屍無所歸雲以東箱給之移屍自門入躬自營舍招復如禮時人以為難及居選官任寄隆重書牘盈案賓客滿門雲應答如流無所壅滯官曹文墨發擿若神時人咸服其明瞻性頗激厲少威重有所是非形於造次士或以此少之初雲為郡號廉潔及貴重頗通饋遺然家無蓄積隨散之親友武帝九錫之出雲忽中疾居二日半召醫徐文伯視之文伯曰緩之一月乃復欲速即時愈政恐二年不復可救雲曰朝聞夕死而况

二年文伯乃下火而牀焉重衣以覆之有頃流汗於此
即起二年果卒帝為流涕即日輿駕臨殯詔贈侍中衛
將軍禮官請謚曰宣勅賜謚曰文有集三十卷子孝才
嗣孫伯翳太原人晉祕書監盛之元孫曾祖放晉國子
博士長沙太守父康起部郎常映雪讀書者伯翳位終
驃騎鄱陽王參軍事雲從父兄縝字子真父濛奉朝請
早卒縝少孤貧事母孝謹年未弱冠從沛國劉瓛學瓛
甚竒之親為之冠在瓛門下積年恒芒屨布衣徒行於

路獻門下多車馬貴游縝在其間聊無恥愧及長博通
經術尤精三禮性質直好危言高論不為士友所安唯
與外弟蕭琛善琛名曰口辯每服縝簡詣年二十九髮
白皤然乃作傷暮詩白髮詠以自嗟仕齊位尚書殿中
郎永明中與魏氏和親簡才學之士以為行人縝及從
弟雲蕭琛琅邪顏幼明河東裴昭明相繼將命皆著名
鄰國時竟陵王子良盛招賓客縝亦與焉嘗侍子良子
良深信釋教而縝盛稱無佛子良問曰君不信因果何

得富貴貧賤。續答曰：人生如樹花，同發隨風而墮。自有拂簾幌，墜於茵席之上；自有闌籬墻，落於糞溷之中。墜茵席者，殿下是也；落糞溷者，下官是也。貴賤雖復殊途，因果竟在何處？子良不能屈然，深怪之。退論其理，著神滅論，以為神即形也，形即神也。形存則神存，形謝則神滅。形者神之質，神者形之用。是則形稱其質，神言其用。形之與神，不得相異。神之於質，猶利之於刀；形之於用，猶刀之於利。利之名非刀也，刀之名非利也。然而捨利

無刀捨刀無利未聞刀沒而利存豈容形亡而神在此
論出朝野諠譁子良集僧難之而不能屈太原王愷乃
著論譏續曰嗚呼范子曾不知其先祖神靈所在欲杜
續後對續又對曰嗚呼王子知其祖先神靈所在而不
能殺身以從之其險詣皆此類也子良使王融謂之曰
神滅既自非理而卿堅執之恐傷名教以卿之才美何
患不至中書郎而顧乖刺為此可便毀棄之續大笑曰
使范續賣論取官已至今僕矣何但中書郎邪後為宜

都太守性不喜神鬼時夷陵有伍相廟唐漢三神廟胡里神廟鎮乃下教斷不祀後以母憂去職居于南州武帝至鎮墨線來迎武帝與鎮有西邸之舊見之甚悅及建康城平以鎮為晉安太守在郡清約資公祿而已遷尚書左丞及還雖親戚無所遺唯餉前尚書令王亮鎮在齊時與亮同臺為郎舊相友愛至是亮擯棄在家鎮自以首迎武帝志在權軸而所懷未滿亦怏怏故私相親結以矯於時竟坐亮徙廣州在南累年追為中書郎

國子博士卒文集十五卷子胥字長才傳父業位國子
博士有口辯大同中常兼主客郎應接吐使卒於鄱陽
內史

韋叡字懷文京兆杜陵人也世為三輔著姓祖元避吏
隱長安南山宋武帝入關以太慰掾徵不至伯父祖征
宋末為光祿勳父祖歸寧遠長史叡事繼母以孝聞祖
征累為郡守每携叡之職視之如子時叡內兄王愷姨
弟杜暉並有鄉里盛名祖征謂叡曰汝自謂何如愷暉

叡謙不敢對祖征曰汝文章或小減學識當過之然幹
國家成功業皆莫汝逮也外兄杜幼文為梁州刺史要
叡俱行梁土富饒往者多以賄敗叡雖幼猶以廉聞宋
永元初袁顛為雍州刺史見而異之引為主簿顛到州
與鄧琬起兵叡求出為義成郡故免顛之禍累遷齊興
太守本州別駕長水校尉右軍將軍齊末多故欲還鄉
里求為上庸太守俄而太尉陳顯達護軍將軍崔慧景
頻逼建鄴人心惶駭西土人謀之叡曰陳雖舊將非高

人才崔頰更事懦而不武天下真人殆興吾州矣乃遣
其二子自結於武帝及兵起檄至叡率郡人伐竹為筏
倍道求赴有衆二千馬二百匹帝見叡甚悅撫几曰他
日見君之面今日見君之心吾事就矣師克郢魯平茹
湖叡多建策皆見用大軍發郢謀留守將上難其人久
之顧叡曰棄騏驎而不乘馬遑遑而更索即日以為江
夏太守行郢州府事初郢城之拒守也男女垂十萬閉
壘經年疾疫死者十七八皆積屍於牀下而生者寢處

其上每屋盈滿，餼料簡隱，卹咸為營理，百姓賴之。梁臺建徵為大理武帝，即位遷廷尉，封梁都子。天監二年，改封永昌，再遷豫州刺史，領歷陽太守。魏遣衆來伐，叡率州兵擊走之。四年，侵魏，詔叡都督衆軍，叡遣長史王超、宗梁郡太守馮道根攻魏小峴城，未能拔。叡巡行圍柵，魏城中忽出數百人，陳於門外，叡欲擊之。諸將皆曰：「向本輕來，請還授甲，而後戰。」叡曰：「魏城中二千餘人，閉門堅守，足以自保。今無故出人於外，必其饒勇，若能挫之。」

其城自拔衆猶遲疑獻指其節曰朝廷授此非以為飾
韋叡之法不可犯也乃進兵魏軍敗因急攻之中宿而
城拔遂進討合肥先是右軍司馬胡景略至合肥久未
能下叡案行山川曰吾聞汾水可以灌平陽即此是也
乃堰肥水頃之堰成水通舟艦繼至魏初分築東西小
城夾肥叡先攻二城既而魏援將楊靈允帥軍五萬奄
至衆懼不敵請表益兵叡曰賊已至城下方復求軍且
吾求濟師彼亦徵衆師克在和古人之義也因戰破之

軍人少安初肥水堰立使軍主王懷靜築城於岸守之
魏攻陷城乘勝至叡堤下軍監潘靈祐勸叡退還巢湖
諸將入請走保三义叡怒曰將軍死綏有前無却因令
取繖扇麾幢樹之堤下示無動志叡素羸每戰未嘗騎
馬以板輿自載督勵衆軍魏兵鑿堤叡親與爭魏軍却
因築壘於堤以自固起鬪艦高與合肥城等四而臨之
城潰俘獲萬餘所獲軍實無所私焉初胡景略與前軍
趙祖悅同軍交惡志相陷害景略一怒自齧其齒齒皆

流血獻以將帥不和將致患禍酌酒自勸景略曰且願
兩虎勿復私鬪故終於此役得無害焉獻每晝接客旅
夜莫軍書三更起張燈達曙撫循其衆常如不及故投
募之士爭歸之所至郡舍修立館宇藩籬墉壁皆應準
繩合肥既平有詔班師去魏軍既近懼為所躡獻悉遣
輜重居前身乘小輿殿後魏人服獻威名望之不敢逼
全軍而還於是遷豫州於合肥五年魏中山王元英攻
北徐州圍刺史昌義之於鍾離衆兵百萬連城四十餘

武帝遣征北將軍曹景宗拒之次邵陽洲築壘相守未
敢進帝怒詔叡會焉賜以龍環御刀曰諸將有不用命
者斬之叡自合肥徑陰陵大澤過澗谷輒飛橋以濟師
人畏魏軍甚多勸叡緩行叡曰鍾離今鑿穴而處負戶
而汲車馳卒奔猶恐其後而况緩乎旬日而至邵陽初
帝勅景宗曰韋叡卿鄉望宜善敬之景宗見叡甚謹帝
聞曰二將和師必濟矣叡於景宗營前二十里夜掘長
塹樹鹿角截洲為城比曉而營立元英大驚以杖擊地

曰是何神也景宗慮城中危懼乃募軍士言文達洪騏
麟等齎敕入城使固城守潛行水底得達東城城中戰
守日苦始知有援於是人百其勇魏將楊大眼將萬餘
騎來戰大眼勇冠三軍所向披靡敵結車為陣大眼聚
騎圍之敵以強弩二千一時俱發洞甲穿中殺傷甚衆
大眼矢貫右臂而走明旦元英自率衆來戰敵乘素木
輿執白角如意以麾軍一日數合元英甚憚其彊魏軍
又夜來攻城飛矢雨集敵子黯請下城以避敵不許軍

中驚敵於城上厲聲呵之乃定魏人先於邵陽洲兩岸
為兩橋樹柵數百步跨淮通道敵裝大艦使梁郡太守
馮道根廬江太守裴邃秦郡太守李文釗等為水軍會
淮水暴長敵即遣之鬪艦競發皆臨賊壘以小船載草
灌之以膏從而焚其橋風怒火盛敢死之士拔柵斫橋
水又漂疾倏忽之間橋柵盡壞道根等皆身自搏戰軍
人奮勇呼聲動天地無不一當百魏人大潰元英脫身
遁去魏軍趨水死者十餘萬斬首亦如之其餘釋甲降

者尚數十萬。劼遣報昌義之義之，且悲且喜，不暇答。但
叫曰：更生！更生！帝遣中書郎周捨勞軍於淮上。劼積所
獲於軍門，捨觀之，謂劼曰：君此獲復與熊耳山等矣。以
功進爵為侯。七年，遷左衛將軍，俄為安西長史、南郡太
守。會司州刺史馬仙琕自北還，軍為魏人所躡，三關擾
動。詔劼督衆軍援馬。劼至安陸，增築城二丈餘，更開大
塹，起高樓，衆頗譏其示弱。劼曰：不然，為將當有怯時。是
時元英復追仙琕將復邵陽之恥，聞劼至，乃退。帝亦詔

罷軍十三年為丹陽尹以公事免十四年為雍州刺史
初叡起兵鄉中客陰雙光泣止叡叡還為州雙光道候
叡笑曰若從公言乞食於路矣餉耕牛十頭叡於故舊
無所惜士大夫年七十以上多與假板縣令鄉里甚懷
之十五年拜表致仕優詔不許徵拜護軍給鼓吹一部
入直殿省居朝廷恂恂未嘗忤視武帝甚禮敬之性慈
愛撫孤兄子過於己子歷官所得祿賜皆散之親故家
無餘財後為護軍居家無事慕萬石陸賈之為人因畫

之於壁以自玩時年雖老暇日猶課諸兒以學第三子稜尤明經史世稱其洽聞叡每坐使稜說書其所發摘稜猶弗之逮武帝方銳意釋氏天下咸從風而化叡自以信受素薄位居大臣不欲與衆俯仰所行略如他日普通元年遷侍中車騎將軍未拜卒於家年七十九遺令薄葬斂以時服武帝即日臨哭甚慟贈車騎將軍開府儀同三司謚曰嚴叡雅有曠世之度涖人以愛惠為本所居必有政績將兵仁愛士卒營幕未立終不肯舍

井竈未成亦不先食被服必於儒者雖臨陣交鋒常緩服乘輿執竹如意以麾進止與裴邃俱為梁世名將餘人莫及初邵陽之後昌義之甚德叡請曹景宗與叡會因設錢二十萬官賭之景宗擲得雉叡徐擲得盧邃取一子反之曰異事遂作塞景宗時與羣帥爭先告捷叡獨居後其不尚勝率多如是世尤以此賢之叡兄纂闡並早知名纂仕齊位司徒記室特進沈約嘗稱纂於上曰恨陛下不與此人同時其學非臣輩也闡為建寧縣

所得俸祿百餘萬還家悉委伯父處分鄉里宗事之位
通直郎獻子放字元直身長七尺七寸腰帶八圍容貌
甚偉襲封永昌縣侯位竟陵太守在郡和理為吏人所
稱大通元年武帝遣兼領軍曹仲宗等攻渦陽又以放
為明威將軍總兵會之魏大將軍費穆率衆奄至放軍
營未立麾下止有二百餘人放從弟洵驍果有勇力單
騎擊刺屢折魏軍洵馬亦被傷不能進放射又三貫矢
衆皆失色請放突出放厲聲叱之曰今日唯有死爾乃

免胄下馬據胡牀處分士卒皆殊死戰莫不一當百遂
北至渦陽魏又遣常山王元昭大將軍李樊乞伏寶費
穆等五萬人來援放大破之渦陽城主王偉以城降魏
人棄諸營壘一時奔潰衆軍乘之斬獲略盡禽穆弟超
并王偉送建鄴還為太子右衛率中大通二年徙北徐
州刺史卒於鎮謚曰宜侯放性宏厚篤實輕財好施於
諸弟尤雍穆每將遠別及行役初還常同一室卧起時
比之三姜初放與吳郡張率皆有側室懷孕因指腹為

婚其後各產男女未及成長而率亡遺嗣孤弱放常贍
卹之及為北徐州時有貴族請婚者放曰吾不失信於
故友乃以息岐娶率女又以女適率子時稱放能篤舊
馬子粲死於侯景之難列在忠義傳中放弟正字敬直
位襄陽太守初正與東海王僧孺善及僧孺為吏部郎
參掌大選賓友故人無不傾意正獨澹然及僧孺擯廢
正復篤素分有踰曩日論者稱焉卒於給事黃門侍郎
子載仕陳為太子右衛率載弟鼎歷陳入隋位光州刺

史載鼎俱列在陳史正弟稜字威直性恬素以書史為業博物彊記當世士咸就質疑位終光祿卿著漢書續訓二卷稜弟黯字務直性彊正少習經史位太傅卿侯景濟江黯屯六門尋改為都督城西南諸軍時景於城外起東西二土山城内亦應之簡文親自負土哀太子以下躬執畚鍤守西土山晝夜苦戰以功授輕車將軍加持節卒於城内初黯為太僕卿而兄子粲為左衛率黯以故常怏怏謂人曰韋粲已落驂騑前朝廷是能

用才不識者頗以此議之

裴邃字深明河東聞喜人魏冀州刺史徽之後也祖壽
孫寓居壽陽為宋武帝前軍長史父仲穆驍騎將軍邃
十歲能屬文善左氏春秋齊東昏踐阼始安王蕭遙光
為揚州刺史引邃為參軍遙光敗邃還壽陽會刺史裴
叔業以壽陽降魏邃遂隨衆北徙魏宣武帝雅重之仕
魏為魏郡太守魏遣王肅鎮壽陽邃固求隨肅密圖南
歸天監初自拔南還除後軍諮議參軍邃求邊境自効

以為廬江太守五年征邵陽洲魏人為長橋斷淮以濟
邃築壘逼橋每戰輒克於是密作沒突艦會甚雨淮水
暴溢邃乘艦徑造橋側進擊大破之以功封夷陵縣子
遷廣陵太守與鄉人共入魏武廟因論帝王功業其妻
甥王篆之密啟武帝云裴邃多大言有不臣跡由是左
遷始安太守邃志立功邊垂不願閑退乃致書於呂僧
珍曰昔阮咸顏延有二始之歎吾才不逮古人今為三
始非其願也後為竟陵太守開置屯田公私使之再遷

西戎校尉北梁秦二州刺史復開創屯田數千頃省息
邊運人吏獲安乃相率餉絹千餘疋邃不欲逆其意納
二疋而已入為大匠卿普通二年義州刺史文僧明以
州入魏魏軍來援以邃為信武將軍督衆軍討焉邃深
入魏境出其不意魏所署義州刺史封壽據檀公峴邃
擊破之遂圍其城壽請降義州平除豫州刺史加督鎮
合肥四年大軍北侵以邃督征討諸軍事先襲壽陽攻
其郭斬門而入一日戰九合為後軍蔡秀成失道不至

邃以援絕拔還於是邃復整兵收集士卒令諸將各以服色相別邃自為黃袍騎先攻拔狄邱覽城黎漿又屠安成馬頭沙陵等戍明年略地至汝潁間所在響應魏壽陽守將長孫承業河間王元琛出城挑戰邃臨淮歎曰今日不破河間方為謝元所笑乃為四甄以待之令直閣將軍李祖憐偽遁以引承業承業等悉衆追之四甄競發魏軍大敗斬首萬餘級承業奔走閉門不敢復出在軍疾篤命衆軍守備身還合肥尋卒贈侍中左衛

將軍進爵為侯謚曰烈邃深沉有思略為政寬明能得士心居身方正有威重將吏憚之少敢犯法及卒淮肥間莫不流涕以為邃不死當大闢土宇云子之禮字子義美容儀能言元理為西豫州刺史母憂居喪唯食麥飯邃廟在光宅寺西堂宇宏敞松柏鬱茂范雲廟在三橋蓬蒿不翦武帝南郊道經二廟顧而嘆曰范為已死裴為更生大同初都下旱蝗四籬門外桐栢凋盡唯邃墓犬牙不入當時異之歷位黃門侍郎武帝設無遮會

儻象驚排突陞衛王公皆散唯之禮與散騎常侍臧盾
不動帝壯之以之禮為壯勇將軍北徐州刺史盾兼中
領軍將軍之禮卒於少府卿謚曰壯子政承聖中位給
事黃門侍郎魏克江陵隨例入長安邃兄髦位中散大
夫髦子之高字如山頗讀書少負意氣隨叔父邃征討
所在立功甚為邃所器重戎政咸以委焉壽陽之役邃
卒於軍所之高隸夏侯夔平壽陽仍除梁郡太守封都
城縣男時魏汝陰來附勅之高應接仍除潁州刺史父

憂還郡起為光遠將軍令討平陰陵盜以為譙州刺史
侯景之亂之高為西豫州刺史率衆入援南豫州刺史
鄱陽嗣王範命之高總督江右援軍諸軍事頃張公洲
柳仲禮至橫江之高遣船舸迎致仲禮與韋粲等俱會
青塘及城陷之高還合肥與鄱陽王範西上元帝遣召
之以為侍中護軍將軍軍到江陵時之高第六弟之悌
在侯景中或傳之悌斬侯景元帝使兼中書舍人黃羅
漢報之高之高竟無言直云賊自殺賊非之高所聞元

帝深嗟其介直承制除特進金紫光祿大夫卒謚曰恭
子畿官至太子右衛率魏克江陵力戰死之之高第十
二弟之橫字如岳少好賓游重氣俠不事產業之高以
其縱誕乃為狹被蔬食以激厲之之橫嘆曰大丈夫富
貴必作百幅被遂與僮屬數百人於芍陂大營田墅遂
致殷積簡文在東宮聞而要之以為河東王常侍遷直
閣將軍侯景之亂隸鄱陽王範討景景濟江仍與範世
子嗣入援臺城城陷退還合肥侯景遣任約逼晉熙範

令之橫下援未及至範薨之橫乃還時尋陽王大心在江州範副梅思立密要大心襲益城之橫斬思立而拒大心大心以州降侯景之橫與兄之高歸元帝廷尉卿河東內史隨王僧辯拒侯景景退遷東徐州刺史封豫寧侯又隨僧辯破景景東奔僧辯命之橫與杜弼入守臺城及陸納據相州叛又隸僧辯南討斬納將李賢明平之又破武陵王於峽口還除吳興太守乃作百幅被以成其志魏克江陵齊遣上黨王高渙挾貞陽侯明

攻東關晉安王承制以之橫為徐州刺史都督衆軍出
守蘄城之橫營壘未周而齊軍大至兵盡矢窮遂於陣
沒贈司空謚曰忠壯子鳳寶嗣

江淹字文通濟陽考城人也父康之南沙令雅有才思
淹少孤貧常慕司馬長卿梁伯鸞之為人不知章句之
學留情於文章早為高平檀超所知常升以上席甚加
禮焉起家南徐州從事轉奉朝請宋建平王景素好士
淹隨景素在南兗州廣陵令郭彥文得罪辭連淹言受

金淹被繫獄自獄中上書曰昔者賤臣叩心飛霜擊於
燕地庶女告天振風襲於齊臺下官每讀其書未嘗不
廢卷流涕何者士有一定之論女有不易之行信而見
疑貞而為戮是以壯夫義士伏死而不顧者以此也下
官聞仁不可恃善不可依謂徒虛語乃今知之伏願大
王暫停左右少加矜察下官本蓬戶桑樞之人布衣韋
帶之士退不飾詩書以驚愚進不買聲名於天下日者
謬得升降承明之闕出入金華之殿何嘗不局影凝嚴

側身局禁者乎竊慕大王之義復為門下之賓備鳴盜
淺術之餘豫三五賤伎之末大王惠以恩光顧以顏色
實佩荆卿黃金之賜竊感豫讓國士之分矣常欲結纓
伏劍少謝萬一剖心摩踵以報所天不圖小人固陋坐
貽謗缺迹墜昭憲身限幽圜履影弔心酸鼻痛骨下官
聞虧名為辱虧形次之是以每一念來忽若有遺加以
涉旬月迫季秋天光沈陰左右無色身非木石與獄吏
為伍此少卿所以仰天椎心泣盡而繼之以血者也下

官雖乏鄉曲之譽然嘗聞君子之行矣其上則隱於簾肆之間卧於巖石之下次則結綬金馬之庭高議雲臺之上退則虜南越之君係單于之頸俱啓丹冊並圖青史寧爭分寸之末競錐刀之利哉下官聞積毀銷金積讒摩骨遠則直生取疑於盜金近則伯魚被名於不義彼之二才猶或如是况在下官焉能自免昔上將之恥絳侯幽獄名臣之羞史遷下室至如下官當何言哉夫以魯連之智辭祿而不反接輿之賢行歌而忘歸子陵

閉關於東越仲蔚杜門於西秦亦良可知也若使下官
事非其虛罪得其實亦當鉗口吞舌伏匕首以殞命何
以見齊魯竒節之人燕趙悲歌之士乎方今聖歷欽明
天下樂業青雲浮洛榮光塞河西泊臨洮狄道北距飛
狐陽原莫不寢仁沐義照景飲醴而已下官抱痛園門
含憤獄戶一物之微有足悲者仰惟大王少垂明白則
梧邱之魂不愧於沈首鵠亭之鬼無恨於灰骨景素覽
書即日出之尋舉南徐州秀才對策上第再遷府主簿

景素為荊州淹從之鎮少帝即位多失德景素專據上
流咸勸因此舉事淹每從容進諫景素不納及鎮京口
淹為鎮軍參軍領南東海郡丞景素與腹心日夜謀議
淹知禍機將發乃贈詩十五首以諷焉會東海太守陸
澄丁艱淹自謂郡丞應行郡事景素用司馬柳世隆淹
固求之景素大怒言於選部黜為建安吳興令及齊高
帝輔政聞其才召為尚書駕部郎驃騎參軍事俄而荆
州刺史沈攸之作亂高帝謂淹曰天下紛紛若是君謂

何如淹曰昔項彊而劉弱袁衆而曹寡羽卒受一劔之辱紹終為奔北之虜此所謂在德不在鼎公何疑哉帝曰試為我言之淹曰公雄武有竒略一勝也寬容而仁恕二勝也賢能畢力三勝也人望所歸四勝也奉天子而伐叛逆五勝也彼志銳而器小一敗也有威無恩二敗也士卒解體三敗也播紳不懷四敗也懸兵數千里而無同惡相濟五敗也雖豺狼十萬而終為我獲焉帝笑曰君談過矣桂陽之役朝廷周章詔檄久之未就齊

高帝引淹入中書省先賜酒食淹素能飲啖食鵝炙垂
盡進酒數升訖文誥亦辦相府建補記室參軍高帝讓
九錫及諸表章皆淹製也齊受禪復為驃騎豫章王嶷
記室參軍建元二年始置史官淹與司徒左長史檀超
共掌其任所為條例並為王儉所駁其言皆不行淹任
性文雅不以著述在懷所撰十三篇竟無次序又領東
武令參掌詔策後拜中書侍郎王儉嘗謂曰卿年三十
五已為中書侍郎才學如此何憂不至尚書金紫所謂

富貴卿自取之但問年壽何如爾淹曰不悟明公見眷
之重永明三年兼尚書左丞時襄陽人開古冢得玉鏡
及竹簡古書字不可識王僧虔善識字體亦不能諳直
云似是科斗書淹以科斗字推之則周宣王之前也簡
殆如新少帝初兼御史中丞明帝作相謂淹曰君昔在
尚書中非公事不妄行在官寬猛能折衷今為南司足
以振肅百僚也淹曰今日之事可謂當官而行更恐不
足仰稱明旨爾於是彈中書令謝朓司徒左長史王績

護軍長史庾弘遠並以托疾不豫山陵公事又奏叔前
益州刺史劉悛梁州刺史陰智伯並贓貨巨萬輒收付
廷尉臨海太守沈昭略永嘉太守庾曇隆及諸郡二千
石并大縣官長多被劾內外肅然明帝謂曰自宋以來
不復有嚴明中丞君今日可謂近世獨步也累遷秘書
監侍中衛尉卿初淹年十三時孤貧常采薪以養母曾
於樵所得貂蟬一具將鬻以供養其母曰此故汝之休
徵也汝才行如此豈長貧賤也可留待得侍中著之至

是果如母言永元中崔慧景舉兵圍都衣冠悉投名刺
淹稱疾不往及事平時人服其先見東昏末淹以秘書
監兼衛尉又副領軍王瑩及武帝至新林淹微服來奔
位相國右長史天監元年為散騎常侍左衛將軍封臨
沮縣伯淹乃謂子弟曰吾本素宦不求富貴今之忝竊
遂至於此平生言止足之事亦以備矣人生行樂須富
貴何時吾功名既立正欲歸身草萊耳以疾遷金紫光
祿大夫改封醴陵侯卒武帝為素服舉哀謚曰憲淹少

以文章顯晚即才思微退云為宣城太守時罷歸始泊
禪靈寺者夜夢一人自稱張景陽謂曰前以一疋錦相
寄今可見還淹探懷中得數尺與之此人大恚曰那得
割截都盡顧見邱遲謂曰餘此數尺既無所以遺君
自爾淹文章躓矣又常宿於冶亭夢一丈夫自稱郭璞
謂淹曰吾有筆在卿處多年可以見還淹乃探懷中得
五色筆一以授之爾後為詩絕無美句時人謂之才盡
凡所著述自撰為前後集并齊史十志並行於世嘗欲

為赤縣經以補山海之闕竟不成子為嗣

任昉字彥昇樂安博昌人也父遥齊中散大夫遥兄遐
字景遠少敦學業家行甚謹位御史中丞金紫光祿大
夫永明中遐以罪將徙荒裔遥懷名請訴言淚交下齊
武帝聞而哀之竟得免遥妻河東裴氏高明有德行嘗
晝卧夢有五色采旗蓋四角懸鈴自天而墜其一鈴落
入懷中心悸因而有娠占者曰必生才子及生昉身長
七尺五寸幼而聰敏早稱神悟四歲誦詩數十篇八歲

能屬文自製月儀辭義甚美褚淵嘗謂遙曰聞卿有令子相為喜之所謂百不為多一不為少由是聞聲藉甚年十二從叔晷有知人之量見而稱其小名曰阿堆吾家千里駒也昉孝友純至每侍親疾衣不解帶言與淚并湯藥飲食必先經口初為奉朝請舉兗州秀才拜太學博士永明初衛將軍王儉領丹陽尹復引為主簿儉每見其文必三復殷勤以為當時無輩曰自傳季友以來始復見於文子若孔門是用其入室升堂於是令昉

作一文及見曰正得吾腹中之欲乃出自作文令昉點
正昉因定數字儉拊几嘆曰後世誰知子定吾文其見
知如此後為司徒竟陵王記室參軍時琅邪王融有才
雋自謂無對當時見昉之文恍然自失以父喪去官泣
血三年杖而後起齊武帝謂昉伯遐曰聞昉哀瘠過禮
使人憂之非直亡卿之寶亦時才可惜宜深相全譬遐
使進飲食當時勉勵回即嘔出昉父遙本性重檳榔以
為常餌臨終嘗求之剖百許口不得好者昉亦所嗜好

深以為恨遂終身不嘗擯擲遭繼母憂昉先以毀瘠每一慟絕良久乃蘇因廬於墓側以終喪禮哭泣之地草為不生昉素彊壯腰帶甚充服闋後不復可識齊明帝深加器異欲大相擢引為愛憎所白乃除太子步兵校尉掌東宮書記齊明帝廢鬱林王始為侍中中書監驃騎大將軍開府儀同三司揚州刺史錄尚書事封宣城郡公使昉具草帝惡其辭斥甚愠昉亦由是終建武中位不過列校昉尤長為筆頗慕傅亮才思無窮當時王

公表奏無不請焉昉起草即成不加點竄沈約一代辭
宗深所推挹永元中紆意於梅虫兒東昏中旨用為中
書郎謝尚書令王亮亮曰卿宜謝梅那忽謝我昉慙而
退末為司徒右長史武帝克建鄴霸府初開以為驃騎
記室參軍專主文翰每制書草沈約輒求同署嘗被急
召昉出而約在是後文筆約參製焉始武帝與昉遇竟
陵王西邸從容謂昉曰我登三府當以卿為記室昉亦
戲帝曰我若登三事當以卿為騎兵以帝善騎也至是

引昉符昔言焉昉奉牋云昔承清宴屬有緒言提挈之
旨形乎善謔豈謂多幸斯言不渝蓋謂此也梁臺建禪
讓文誥多昉所具奉世叔父母不異嚴親事兄嫂恭謹
外氏貧闕恒營奉供養祿奉所收四方餉遺皆頒之親
戚即日便盡性通脫不事儀形喜怒未嘗形於色車服
亦不鮮明武帝踐阼歷給事黃門侍郎吏部郎出為義
興太守歲荒民散以私奉米豆為粥活三千餘人時產
子者不舉昉嚴其制罪同殺人孕者供其資費濟者千

室在郡所得公田奉秩八百餘石昉五分督一餘者悉
原兒妾食麥而已友人彭城到溉溉弟洽從昉共為山
澤游及被代登舟止有絹七疋米五石至都無衣鎮軍
將軍沈約遺裙衫迎之重除吏部郎參掌大選居職不
稱尋轉御史中丞祕書監自齊永元以來祕閣四部篇
卷紛雜昉手自讎校由是第目定焉出為新安太守在
郡不事邊幅率然曳杖徒行邑郭人通辭訟者就路決
焉為政清省吏人便之卒於官唯有桃花米二十石無

以為斂遺言不許以新安一物還都雜木為棺浣衣為斂闔境痛惜百姓共立祠堂於城南歲時祠之武帝聞問方食西苑綠沈瓜投之於盤悲不自勝因屈指曰昉少時常恐不滿五十今四十九可謂知命即日舉哀哭之甚慟追贈太常謚曰敬子昉好交結獎進士友不附之者亦不稱述得其延譽者多見升擢故衣冠貴游莫不多與交好坐上客恒有數十時人慕之號曰任君言如漢之三君也在郡尤以清潔著名百姓年八十以上

者遣戶曹掾訪其寒溫嘗欲營佛齋調楓香二石始入
三斗便出教長斷曰與奪自己不欲貽之後人郡有蜜
嶺及楊梅舊為太守所采昉以冒險多物故即時停絕
吏人咸以百餘年未之有也為家誠殷勤甚有條貫陳
郡殷芸與建安太守到溉書曰哲人云亡儀表長謝元
龜何寄指南何託其為士友所推如此昉不事生產至
乃居無室宅時或譏其多乞貸亦隨復散之親故常自
歎曰知我者亦以叔則不知我者亦以叔則既以文才

見知時人云任筆沈詩昉聞甚以為病晚節轉好著詩
欲以傾沈用事過多屬辭不得流便自爾都下士子慕
之轉為穿鑿於是才有才盡之談矣博學於書無所不見
家雖貧聚書至萬餘卷率多異本及卒後武帝使學士
賀縱共沈約勘其書目官無者就其家取之所著文章
數十萬言盛行於時東海王僧孺嘗論之以為過於董
生揚子昉樂人之樂憂人之憂虛往實歸忘貧去吝行
可以厲風俗義可以厚人倫能使貧夫不取懦夫有立

其見重如此有子東里西華南容北叟並無術業墜其
家聲兄弟流離不能自振生平舊交莫有收恤西華冬
月著葛帔練裙道逢平原劉孝標泣然矜之曰我當為
卿作計乃著廣絕交論以譏其舊交曰客問主人曰朱
公叔絕交論為是乎為非乎主人曰客奚此之問客曰
夫草蟲鳴則阜螽躍龍嘯而清風起故氤氲相感霧
涌雲蒸嚶鳴相召星流電激是以王陽登則貢公喜罕
生逝而國僑悲且心同琴瑟言鬱郁於蘭茝道叶膠漆

志婉嬾於墳麓聖賢以此鏤金版而鐫盤盃書玉牒而刻鐘鼎若乃匠石輟成風之妙巧伯牙息流波之雅引范張款款於下泉尹班陶陶於永夕駱驛縱橫煙霏雨散巧歷所不知心計莫能測而朱益州汨彝叙粵謨訓捶直切絕交遊視黔首以鷹鷂媿人靈於豺虎蒙有猜焉請辯其惑主人忻然曰客所謂撫弦徽音未達燥濕變響張羅沮澤不睹鴻鴈高飛蓋聖人握金鏡闡風烈龍驤虺屈從道汗隆日月連璧贊壘壘之弘致雲飛雷

薄顯棣華之微旨若五音之變化濟九成之妙曲此朱
生得元珠於赤水謨神睿以為言至夫組織仁義琢磨
道德懽其愉樂恤其陵夷寄通靈臺之下遺跡江湖之
上風雨急而不輟其音霜雪零而不渝其色斯賢達之
素交歷萬古而一遇逮叔世人訛狙詐颺起溪谷不能
踰其險鬼神無以究其變競毛羽之輕趨錐刀之末於
是素交盡利交興天下蚩蚩鳥驚雷駭然利交同源派
流則異較言其略有五術焉若其寵均董石權壓梁竇

雕刻百工鑪錘萬物吐嗽興雲雨呼吸下霜露九域聳
其風塵四海疊其燠灼靡不望影星奔藉響川鶩雞人
始唱鶴蓋成陰高門旦開流水接軫皆願摩頂至踵隳
膽抽腸約同要離焚妻子誓殉荆卿湛七族是日勢交
其流一也富埒陶白貲巨程羅山擅銅陵家藏金穴出
平原而聯騎居里閤而鳴鐘則有窮巷之賓繩樞之士
冀宵燭之末光邀潤屋之微澤魚貫鳧躍駸脊鱗萃分
鴈鶩之稻梁霑玉笋之餘瀝銜恩遇進款誠援青松以

示心指白水而旌信是曰賄交其流二也陸大夫燕喜
西都郭有道人倫東國公卿貴其籍甚縉紳羨其登仙
加以斂頤感頰涕唾流沫騁黃馬之劇談縱碧雞之雄
辯叙溫燠則寒谷成暄論巖枯則春叢零葉飛沉出其
顧指榮辱定其一言於是有弱冠王孫綺紈公子道不
挂於通人聲未適於雲閣攀其鱗翼丐其餘論附騏驥
之旄端軼歸鴻於碣石是曰談交其流三也陽舒陰慘
生靈大情憂合歡離品物恒性故魚以泉涸而响沫鳥

因將死而鳴哀同病相憐綴河上之悲曲恐懼寘懷昭
谷風之盛典斯則斷金由於湫隘刎頸起於苦蓋是以
伍員濯漑於宰詒張王撫翼於陳相是曰窮交其流四
也馳騫之俗澆薄之倫無不操權衡執纖縵衡所以揣
其輕重縵所以屬其鼻息若衡不能舉縵不能飛雖顏
冉龍翰鳳雛曾史蘭薰雪白舒向金玉泉海卿雲黼黻
河漢視若游塵遇同土梗莫肯費其半菽罕有落其一
毛若衡重錙縵微影撇雖共工之蒐慝驩兜之掩義

南荆之跋扈東陵之巨猾皆為匍匐委蛇折支舐痔金膏翠羽將其意脂膏便辟導其誠故輪蓋所游必非夷惠之室苞苴所入實行張霍之家謀而後動芒毫寡忒是曰量交其流五也凡斯五交義同賈嚮故桓譚譬之於闐闐林回諭之於甘醴夫寒暑遞進盛衰相襲或前榮而後悴或始富而終貧或初存而末亡或古約而今泰循環反覆迅若波瀾此則徇利之情未嘗異變化之道不得一由是觀之張陳所以凶終蕭朱所以隙末斷

馬可知矣而翟公方規規然勒門以箴客何所視之晚
乎然因此五交是生三釁敗德殄義禽獸相若一釁也
難固易攜讐訟所聚二釁也名陷饕餮貞介所羞三釁
也古人知三釁之為梗懼五交之速尤故王丹威子以
櫓楚朱穆昌言而示絕有旨哉近世有樂安任昉海內
髦傑早綰銀黃夙昭人譽道文麗藻方駕曹王英跼俊
邁聯橫許郭類田文之愛客同鄭莊之好賢見一善則
盱衡扼腕遇一才則揚眉抵掌雌黃出其唇吻朱紫由

其月旦於是冠蓋輻湊衣裳雲合輜輶擊鞞坐客恒滿
蹈其閭闔若升闕里之堂入其隩隅謂登龍門之坂至
於顧眄增其倍價翦拂使其長鳴影組雲臺者摩肩趨
走丹墀者疊跡莫不締恩狎結綢繆思惠莊之清塵庶
羊左之徽烈及瞑目東粵歸骸洛浦總帳猶懸門空漬
酒之彥墳草未宿野絕動輪之賓貌爾諸孤朝不謀夕
流離大海之南寄命瘴癘之地自昔把臂之英金蘭之
友曾無羊舌下泣之仁寧慕郇成分宅之德嗚呼世路

之嶮巖一至於此也太行孟門豈云蘄絕是以耿介之士疾其若斯裂裳裹足棄之長驚獨立高山之頂懽與麋鹿同羣皦皦然絕其霧濁誠耻之也誠畏之也到溉見其論抵几於地終身恨之昉撰雜傳二百四十七卷地記二百五十二卷文章三十三卷東里位尚書外兵

郎

柳惔字文通河東解人也伯祖元景宋贈太尉父世隆齊左光祿大夫侍中元景世隆俱有傳惔好學工製文

尤曉音律少與長兄中書郎悅齊名琅邪王儉謂人曰
柳氏二龍可謂一日千里儉為尚書左僕射嘗造世隆
宅世隆謂為詣已徘徊久之及至門唯求悅及悵遣謂
世隆曰賢子俱有盛才一日見顧今故報禮若仍相造
似非本意恐年少窺人嘗豫齊武烽火樓宴帝善其詩
謂豫章王嶷曰悵非徒風韻精爽亦屬文道麗後為巴
東王子響友子響為荊州悵隨之鎮響昵近小人悵知
將為禍稱疾還都及難作以免累遷新安太守居郡以

無政績免建武末為梁南秦二州刺史及武帝起兵悞
舉漢中以應武帝帝受命為太子詹事加散騎常侍武
帝之鎮襄陽悞祖道帝解茅土玉環贈之天監二年元
會帝謂曰卿所佩玉環是新亭所贈邪對曰既而瑞感
神衷臣謹服之無斃帝因勸之酒悞時未卒爵帝曰吾
常比卿劉越石近辭卮酒邪罷會封曲江縣侯帝因宴
為詩貽悞曰爾實冠羣后惟余實念功帝又嘗謂曰徐
元瑜違命嶺南周書父子兄弟罪不相及朕已放其諸

子何如悞曰罰不及嗣賞延於後今復見之聖朝時以
為知言尋遷尚書左僕射年六十卒於湘州刺史諡曰
穆悞度量寬博家人未嘗見其喜愠甚重其婦頗成畏
憚性愛音樂女妓精麗略不敢視僕射張稷與悞狎密
而為悞妻賞敬稷每詣悞必先相問夫人悞每欲見妓
恒因稷請奏其妻隔幔坐妓然後出悞因得留目悞著
仁政傳及諸詩賦粗有辭義子昭位中書郎襲爵曲江
侯悞弟憚字文暢少有志行好學善尺牘與陳郡謝滄

鄰居深見友愛濤曰宅南柳郎可為儀表初宋時有嵇
元榮羊蓋者並善琴云傳戴安道法惲從之學惲特窮
其妙齊竟陵王子良聞而引為法曹行參軍唯與王暕
陸果善每嘆曰暕雖名家猶恐累我也雅被子良賞狎
子良嘗置酒後園有晉太傅謝安鳴琴在側援以授惲
惲彈為雅弄子良曰卿巧越嵇心妙臻羊體良質美手
信在今夜豈止當今稱奇亦可追蹤古烈為太子洗馬
父憂去官著述先頌申其固極之心文甚哀麗後試守

鄱陽相聽吏屬得盡三年喪禮署之文教百姓稱焉還
除驃騎從事中郎武帝至建鄴惲候謁石頭以為征東
府司馬上牋請城平之日先收圖籍及遵漢高寬大之
義帝從之徙為相國右司馬天監元年除長兼侍中與
僕射沈約等共定新律惲立性貞素以貴公子早有令
名少工篇什為詩云亭臯木葉下隴首秋雲飛琅邪王
融見而嗟賞因書齋壁及所執白團扇武帝與宴必詔
惲賦詩嘗和武帝登景陽樓篇云太液滄波起長楊高

樹秋翠華承漢遠雕輦逐風游深見賞美當時咸共稱
傳歷平越中郎將廣州刺史祕書監右衛將軍再為吳
興太守為政清靜人吏懷之於郡感疾自陳解任父老
千餘人拜表陳請事未施行卒初惲父世隆彈琴為士
流第一惲每奏其父曲常感思復變體備寫古曲嘗賦
詩未就以筆拙琴坐客過以筋和之惲驚其哀韻乃製
為雅音後傳擊琴自於此惲常以今聲轉棄古法乃著
清調論具有條流齊竟陵王嘗宿宴明旦將朝見惲投

壺聲不絕停輦久之進見遂晚齊武帝遲之王以實對
武帝復使為之賜絹二十疋嘗與琅邪王瞻博射嫌其
皮濶乃摘梅帖烏珠之上發必命中觀者驚駭武帝好
奕碁使憚品定碁譜集能者二百七十八人第其優劣
為碁品三卷憚為第二焉帝謂庾楷曰吾聞君子不可
求備至如柳憚可謂具美分其才藝足了十人憚著卜
杖龜經性好醫術盡其精妙少子偃字彥游年十二武
帝引見詔問讀何書對曰尚書又問有何美句對曰德

惟善政政在養民衆咸異之詔尚武帝女長城公主拜
駙馬都尉都亭侯位鄱陽內史卒子盼尚陳文帝女富
陽公主拜駙馬都尉加散騎常侍愚戇使酒因醉乘馬
入殿門為有司所劾卒於家贈侍中中護軍惲弟愷字
文深少有大意好元言通老易武帝舉兵至姑熟愷與
兄惲及諸友朋於小郊候接時道路猶梗愷與諸人同
憇逆旅食俱去行里餘愷曰寧我負人無人負我若復
有追堪憇此客舍命左右燒逆旅舍以絕後追當時服

其善斷歷位給事黃門侍郎與琅邪王峻齊名俱為中
庶子時人號為方正後為鎮北始興王長史王移鎮益
州復請愷帝曰柳愷風標才氣恐不能久為少王臣王
祈請數四不得已以為鎮西長史蜀郡太守在蜀廉恪
為政益部懷之愷弟忱字文若年數歲父世隆及母閻
氏並疾忱不解帶經年及居喪以毀聞仕齊為西中郎
主簿東昏遣巴西太守劉山陽由荊州襲武帝于雍州
西中郎長史蕭穎胄計未定召忱及其所親席闡文等

夜入議之忱及闡文並勸同武帝頴胄從之以忱為寧朔將軍累遷侍中郢州平頴胄議遷都夏口忱以巴峽未賓不宜輕捨根本搖動人心不從俄而巴東兵至峽口遷都之議乃息論者以為見機及武帝受命封州陵伯歷五兵尚書祕書監散騎常侍改授給事中光祿大夫疾篤不拜卒謚曰穆忱兄弟十五人多少亡唯第二兄愔第三兄暉第四兄澄及忱三兩年間迭為侍中復居方伯當世罕比子範嗣忱從父慶遠字文和父叔珍

義陽內史慶遠仕齊為魏興太守郡遭暴水人欲移於
杞城慶遠曰吾聞江河長不過三日命築土而已俄而
水退百姓服之後為襄陽令武帝之臨雍州問京兆人
杜暉求州綱紀暉言慶遠武帝曰文和吾已知之所問
未知者耳因辟為別駕慶遠謂所親曰天下方亂定霸
者其吾君乎因盡誠協贊及起兵慶遠常居帷幄為謀
主從軍東下身先士卒武帝行營見慶遠頓舍嚴整每
嘆曰人人若是吾又何憂建康城平為侍中帶淮陵齊

昌二郡太守城內嘗夜火衆並驚懼武帝時居宮中悉
斂諸門鑰問柳侍中何在慶遠至悉付之其見任如此
霸府建為從事中郎武帝受禪封重安侯位散騎常侍
改封雲杜侯出為雍州刺史加都督帝餞於新亭謂曰
卿衣錦還鄉朕無西顧憂矣始武帝為雍州慶遠為別
駕謂曰昔羊公語劉弘卿後當居吾處今相觀亦復如
是曾未十年而慶遠督府談者以為逾於魏詠之累遷
侍中領軍將軍給扶出為雍州刺史慶遠重為本州頗

厲清節士庶懷之卒官贈開府儀同三司謚曰忠惠侯
喪還都武帝親出臨之初慶遠從父兄世隆嘗謂慶遠
曰吾昔夢太尉以褥席見賜吾遂亞台司適又夢以吾
褥席與汝汝必光我門族至是慶遠亦繼世隆焉慶遠
子津字元舉雖乏風華性甚彊直人或勸之聚書津曰
吾嘗請道士上章驅鬼安用此鬼名邪歷散騎常侍太
子詹事襲封雲杜侯侯景圍城既急帝召津問策對曰
陛下有邵陵臣有仲禮不忠不孝賊何由可平太清三

年城陷卒子仲禮勇力兼人少有膽氣身長八尺眉目
踈朗初簡文帝為雍州刺史津為長史及簡文入居儲
宮津亦得侍從仲禮留在襄陽馬仗軍人悉付之撫循
故舊甚得衆和起家著作佐郎稍遷雷威將軍陽泉縣
侯中大通中西魏將賀拔勝來逼樊鄧仲禮出擊破之
除黃門郎稍遷司州刺史武帝思見其面使畫工圖之
初侯景潛圖反噬仲禮先知之屢啟求以精兵三萬討
景朝廷不許及景濟江朝野便望其至仲禮率雍司精

卒赴援諸藩推為總督景素聞其名甚憚之仲禮亦自謂當世英雄諸將莫已若也韋粲見攻仲禮方食投箸被練馳之騎能屬七十比至粲已敗仲禮因與景戰於青塘大敗之景與仲禮交戰各不相知仲禮稍將及景而賊將支伯仁自後斫仲禮中肩馬陷於淖賊知為仲禮聚稍刺之騎將郭山石救之以免自此壯氣外衰不復言戰神情傲很凌蔑將帥邵陵王綸亦鞭策軍門每日必至累刻移時仲禮亦弗見也綸既忿難怨隙遂成

而仲禮常置酒高會日作優倡毒掠百姓汙辱妃主父
津登城謂曰汝君父在難不能盡心竭力百代之後謂
汝為何仲禮聞之言笑自若晚又與臨城公大連不協
景嘗登朱雀樓與語遺以金鑲是後閉營不戰衆軍日
往固請皆悉拒焉南安侯駿謂曰城急如此都督不復
處分如脫不守何面以見天下義士仲禮無以應之及
臺城陷侯景矯詔使石城公大款以白虎幡解諸軍仲
禮召諸將軍會議邵陵王以下畢集王曰今日之命委

之將軍仲禮熟視不對裴之高王僧辯曰將軍擁衆百萬致宮闕淪沒正當悉力決戰何所多言仲禮竟無一言諸軍乃隨方各散時湘東王繹遣王琳送米二十萬石以饋軍至姑熟聞臺城陷乃沈米於江而退仲禮及弟敬禮羊鴉仁王僧辯趙伯超並開營降賊時城雖淪陷援軍甚衆軍士咸欲盡力及聞降莫不歎憤論者以爲梁禍始於朱异成於仲禮仲禮等入城並先拜景而後見帝帝不與言既而景留其弟敬禮羊鴉仁遣仲禮

僧辯西上各復本位餞於後渚景執仲禮手曰天下之事在將軍耳郢州已西並以相付及至江陵會岳陽王譽南寇湘東王以仲禮為雍州刺史襲襄陽仲禮方觀成敗未發及南陽圍急杜岸請救仲禮乃以別將夏侯彊為司州刺史守義陽自帥衆如安陸使司馬康昭如竟陵討孫暲暲執魏戍人以降仲禮命其將王叔孫為竟陵太守副軍馬岫為安陸太守置拏於安陸而以輕兵師於滌頭將侵襄陽岳陽王譽告急於魏魏遣大將

楊忠援之仲禮與戰於滌頭大敗并弟子禮沒於魏魏相安定公宇文泰待仲禮以客禮西魏於是盡得漢東敬禮少以勇烈聞麓暴無行檢恒略賣人為百姓所苦故襄陽有柳四郎歌起家著作佐郎稍遷扶風太守侯景度江敬禮率馬步三千赴援至都與景頻戰甚著威名臺城陷景與仲禮經略上流留敬禮為質以為護軍將軍景餞仲禮於後渚敬禮謂仲禮曰景今來會敬禮抱之兄便可殺雖死無恨仲禮壯其言許之及酒數行

敬禮目仲禮仲禮見備衛嚴不敢動遂不果會景征晉
熙敬禮與南康王會理謀襲其城尅期將發建安侯蕭
賁告之遂遇害臨死曰我兄老婢也國敗家亡實余之
責今日就死豈非天乎

王志字次道琅邪臨沂人齊侍中僧虔之子也志九歲
居所生母憂哀容毀瘠為中表所異弱冠選尚宋孝武
女安固公主拜駙馬都尉褚淵時為司徒引志為主簿
謂其父僧虔曰朝廷之恩本為殊特所可光榮在屈賢

子累遷宣城内史清謹有恩惠郡人張倪吳慶爭田經
年不決志到官父老相謂曰王府君有德政吾鄉里乃
有如此爭倪慶因相攜請罪所訟地遂成閑田後為東
陽太守郡獄有重囚十餘冬至日悉遣還家過節皆反
唯一人失期志曰此自太守事主者勿憂明旦果至稱
為婦孕吏人益嘆服之為吏部尚書在選以和理稱崔
慧景平以例加右軍將軍封臨汝侯固讓改領右衛將
軍及武帝軍至城内弑東昏百僚署名送首志歎曰冠

雖弊可加足乎因取庭樹葉接服之偽悶不署名武帝覽牋無志署心嘉之弗以讓也霸府開為驃騎大將軍長史梁臺建位散騎常侍中書令天監初為丹陽尹為政清靜都下有寡婦無子姑亡舉責以斂葬既而無以還之志愍其義以奉錢償焉時年饑每旦為粥於郡門以賑百姓衆悉稱惠常懷止足謂諸子姪曰謝莊在宋孝武時位止中書令吾自視豈可過之三年為散騎常侍中書令因多謝病簡通賓客九年還為散騎常侍金

紫光祿大夫卒志善藁隸當時以為楷法齊游擊將軍
徐希秀亦號能書常謂志為書聖志家居建康禁中里
馬糞巷父僧虔門風寬恕志尤醇厚所歷不以罪咎劾
人門下客嘗盜脫志車幘賣之志知而不問待之如初
賓客遊其門者專蓋其過而稱其善兄弟子姪皆篤實
謙和時人號馬糞諸王為長者普通四年志改葬武帝
厚賻贈之諡曰安有五子緝休諲操素志兄慈仕齊為
冠軍將軍卒贈太常慈子泰字仲通幼敏悟年數歲時

祖母集諸孫姪散棗粟於牀羣兒競之泰獨不取問其故對曰不取自當得賜由是中表異之少好學手所抄寫二千許卷及長通和溫雅家人不見喜愠之色姊夫齊江夏王鋒為齊明帝所害外甥蕭子友並孤弱泰資給撫訓逾於子姪天監元年為祕書丞自齊永元之末後宮火延燒祕書書圖散亂殆盡泰表校定繕寫武帝從之歷中書侍郎掌吏部仍即真自過江吏部郎不復典大選令史以下小人求競者輻湊前後少能稱職泰

為之不為貴賤請屬易意天下稱平轉黃門侍郎每豫
朝宴刻燭賦詩文不加點帝深賞嘆沈約常曰王有養
炬謝有覽舉養泰小字炬筠小字也始草大理以泰為
廷尉卿再歷侍中後為都官尚書泰能接人士故每願
其居選官頃之為吏部尚書衣冠屬望未及選舉乃疾
改除散騎常侍左驍騎將軍未拜卒諡曰夷子廓志弟
揖位太中大夫揖子筠字元禮一字德柔幼而警悟七
歲能屬文年十六為芍藥賦其辭甚美及長清靜好學

與從兄泰齊名沈約見筠以為似外祖袁粲謂僕射張
稷曰王郎非唯額類袁公風韻都欲相似稷曰袁公見
人輒矜嚴王郎見人必嬉笑惟此一條不能酷似仕為
尚書殿中郎王氏過江以來未有居郎署或勸不就筠
曰陸平原東南之秀王文度獨步江東吾得比蹤昔人
何所多恨乃欣然就職沈約每見筠文咨嗟嘗謂曰昔
蔡伯喈見王仲宣稱曰王公之孫吾家書籍悉當相與
僕雖不敏請附斯言自謝眺諸賢零落平生意好殆絕

不謂疲暮復逢於君約於郊居宅閣齋請筠為草木十
詠書之壁皆真寫文辭不加篇題約謂人曰此詩指物
程形無假題署約製郊居賦構思積時猶未都畢示筠
草筠讀至雌霓五的反連蜷約撫掌欣抃曰僕常恐人呼

為霓

五兮反

次至墜石礮星及冰懸堦而帶抵筠皆擊節

稱贊約曰知音者希真殆竒絕所以相要政在此數句
耳筠又嘗為詩呈約約即報書歎詠以為後進擅美筠
又能用彊韻每公宴並作辭必研靡約嘗啓上言晚來

名家無先筠者又於御筵謂王志曰賢弟子文章之美
可謂後來獨步謝朓常見語云好詩圓美流轉如彈丸
近見其數首方知此言為實累遷太子洗馬中舍人並
掌東宮管記昭明太子愛文學士常與筠及劉孝綽陸
倕到洽殷鈞等遊宴元圃太子獨執筠袖撫孝綽肩曰
所謂左把浮邱袖右拍洪崖肩其見重如此筠又與殷
鈞以方雅見禮後為中書郎奉勅製開善寺寶誌法師
碑文辭甚麗逸又勅撰中書表奏三十卷及所上賦頌

都為一集後為太子家令復掌管記普通元年以母憂去職筠有孝性毀瘠過禮大通二年為司徒左長史三年昭明太子薨勅製哀策文復見嗟賞尋出為臨海太守在郡侵刻還資有芒屨兩船他物稱是為有司所奏不調累年後歷秘書監太府卿度支尚書司徒左長史及簡文即位為太子詹事筠家累千金性儉嗇外物簾弊所乘牛嘗飼以青草及遇亂舊宅先為賊焚乃寓居國子祭酒蕭子雲宅夜忽有盜攻懼墜井卒時年六十

九家人十三口同遇害人棄尸積於空井中筠狀貌寢
小長不滿六尺性弘厚不以藝能高人而少擅才名與
劉孝綽見重當時其自序云余少好抄書老而彌篤雖
遇見瞥觀皆即疏記後重省覽懽興彌深習與性成不
覺筆倦自年十三四齊建武二年乙亥至梁大同六年
四十載矣初年讀五經皆七八十遍愛左氏春秋吟諷
常為口實廣略去取凡三過五抄餘經及周官儀禮國
語爾雅山海經本草並再抄子史諸集皆一遍未嘗情

人假手並躬自抄錄大小百餘卷不足傳之好事蓋以
備遺忘而已又與諸兒書論家門集云史傳稱安平崔
氏及汝南應氏並累葉有文才所以范蔚宗云崔氏雕
龍然不通父子兩三世耳非有七葉之中名德重光爵
位相繼人人有集如吾門者也沈少博約常語人云吾
少好百家之言身為四代之史自開闢以來未有爵位
蟬聯文才相繼如王氏之盛也汝等仰觀堂構思各努
力筠自撰其文章以一官為一集自洗馬中書中庶吏

部左佐臨海太府各十卷尚書三十卷凡一百卷行於
世子祥仕陳位黃門侍郎揖弟彬字思文好文章習篆
隸與志齊名時人為之語曰三真六草為天下寶齊武
帝起舊宮彬獻賦文辭典麗尚齊高帝女臨海長公主
拜駙馬都尉仕齊歷太子中庶子徙永嘉太守卜室於
積穀山有終焉之志天監中歷吏部尚書祕書監卒謚
曰惠彬立身清白推賢接士有士君子風彬弟寂字子
元性迅動好文章讀范滂傳未嘗不嘆悒王融敗後賓

客多歸之齊建武初欲獻中興頌兄志謂曰汝膏粱年少何患不達不鎮之以靜將恐貽譏寂乃止位祕書郎卒年二十一志從子騫字思寂本字元成與齊高帝偏諱同故改焉太尉儉之子也騫性凝簡慕樂廣之為人未嘗言人之短諸女子姪皆嬪王尚主朔望來歸輜輶填咽非所欲也勅歲中不過一再見嘗從容謂諸子曰吾家本素族自可依流平進不須苟求也歷黃門郎司徒右長史不事產業有舊墅在鐘山八十餘頃與諸宅

及故舊共佃之常謂人曰我不如鄭公業有田四百頃而食常不周以此為愧永元末召為侍中不拜三年春枉矢晝見西方長十餘丈騫曰此除舊布新之象也及武帝起兵騫曰天時人事其在此乎武帝霸府建引為大司馬詔議參軍遷侍中及帝受禪降封為侯歷位度支尚書中書令武帝於鐘山西造大愛敬寺騫舊墅在寺側者即王導賜田也帝遣主書宣旨就騫市之欲以施寺答云此田不賣若勅取所不敢言酬對又脫略帝

怒遂付市評田價以直逼還之由是忤旨出為吳興太守騫性侈於味而儉於服頗以多忌為累又惰於接物雖王書宣勅或過時不見才望不及弟暕特以儉之嫡故不棄於時暕為尚書左丞僕射當朝用事騫自中書令為郡邑邑不樂在郡卧不視事徵復為度支尚書加給事中領射聲校尉以母憂去職普通三年卒年四十九贈侍中金紫光祿大夫謚曰安子規字威明八歲丁所生母憂居喪有至性齊太尉徐孝嗣每見必為流涕

稱曰孝童叔父暕亦深器重之常曰此兒吾家千里駒也年十二略通五經大義及長遂博涉有口辯為本州迎主簿起家祕書郎累遷太子洗馬天監十二年改造太極殿畢規獻新殿賦其辭甚工後為晉安王綱雲麾詔議參軍久之為新安太守父憂去職服闋襲封南昌縣侯除中書黃門侍郎勅與陳郡殷芸琅邪王錫范陽張緬同侍東宮俱為昭明太子所禮湘東王繹時為丹陽尹與朝士宴集屬規為酒令規從容曰江左以來未

有茲舉特進蕭琛金紫光祿大夫傳昭在坐並謂知言
朱异嘗因酒卿規責以無禮普通初陳慶之北侵陷
洛陽百僚稱慶規退曰可弔也又何賀焉道家有云非
為功難成功難也昔桓溫得而復失宋武竟無成功我
孤軍無援深入寇境將為亂階俄見覆沒六年武帝於
文德殿餞廣州刺史元景隆詔羣臣賦詩同用五十韻
規援筆立奏其文又美武帝嘉焉即日授侍中後為晉
安王長史王立為太子仍為散騎常侍太子中庶子侍

東宮太子賜以所服貂蟬并降令書悅是舉也尋為吳郡太守主書芮珍宗家在吳前守宰皆傾意附之至是珍宗假還規遇之甚薄珍宗還都密奏規不理郡事俄徵為左戶尚書郡境千餘人詣闕請留表三奏不許求於郡樹碑許之規常以門宗貴盛恒思減退後為太子中庶子領步兵校尉辭疾不拜遂於鐘山宋熙寺築室居焉卒贈光祿大夫謚曰文皇太子出臨哭與湘東王繹令曰王威明風韻適上神峯標映千里絕迹百尺無

枝實俊人也一爾過隙永歸長夜金刀掩芒長淮絕涸
去歲冬中已傷劉子今茲寒孟復悼王孫俱往之傷信
非虛說規集後漢衆家異同注續漢書二百卷文卷二
十卷子褒魏克江陵入長安騫弟暕字思晦年數歲而
風神警拔有成人之度時父儉作宰相賓客盈門見暕
曰公才公望復在此矣弱冠選尚淮南長公主拜駙馬
都尉歷秘書丞齊明帝詔求異士始安王遙光薦暕及
東海王僧孺除暕騎從事中郎天監中歷位侍中吏部

尚書領國子祭酒門貴與物隔不能留心寒素頗稱刻
薄後為尚書左僕射領國子祭酒卒謚曰靖子承幼訓
並通顯承字安期初為祕書郎累遷中書黃門侍郎兼
國子博士時膏腴貴遊咸以文章相尚罕以經術為業
唯承獨好儒業遷長兼侍中俄轉國子祭酒承祖儉父
暕皆為此職三世為國師前代未之有久之出為東陽
太守政存寬惠吏人悅之卒郡謚曰章承性簡貴有風
格右衛朱异當朝用事每休下車馬填門有魏郡申英

者門寒才俊好危言高論以忤權右嘗指异門曰此中
輻湊皆為利徃能不至者唯大小王東陽耳小東陽即
承弟幼也時唯承兄弟及褚翔不至异門世並稱之訓
字懷範生而紫胞師媪云法當貴幼聰警有識量僧正
惠超見而竒之謂門人羅智國曰四郎眉目踈朗舉動
和韻此是興門戶者智國以白踈踈亦曰不墜基業其
在文殊文殊訓小字也年十三踈亡憂毀家人莫識十
六召見文德殿應對爽徹上目送之久謂朱异曰可謂

相門有相初補國子生問說師袁昂昂曰久籍高名有
勞虛想及觀容止若披雲霧俄而諸袁子弟來昂謂諸
助教曰我兒出十數若有一子如此實無所恨射策除
祕書郎累遷祕書丞嘗賦詩云旦奭匡世功蕭曹佐眈
俗追祖儉之志也後拜侍中入見武帝帝問何敬容曰
褚淵年幾為宰相敬容曰少過三十上曰今之王訓無
謝褚淵訓美容儀善進止文章為後進領袖年二十六
卒謚溫子志從父兄瞻字思饒祖柳字休季宋太保弘

之兄也柳仕宋位光祿大夫東亭侯父適字世倫位侍
中光祿大夫瞻年六歲從師時有伎經門過同業皆出
觀瞻獨不視習業如初從父僧達聞而異之謂其父猷
曰大宗不衰寄之此子年十二居父憂以孝聞服闋襲
封東亭侯後頗好逸遊為閭里患以輕薄稱及長折節
修士操涉獵書記善碁工射歷位驃騎將軍王晏長史
晏誅出為晉陵太守絜已為政妻子不免饑寒時號廉
平王敬則作亂瞻赴都敬則經晉陵郡人多附之敬則

敗臺軍討賊黨瞻言愚人易動不足窮法齊明帝從之
所全萬數遷御史中丞梁臺建為侍中起部尚書性率
亮居選所舉用意而行頗嗜酒每飲輒彌月而精神朗
瞻不廢簿領武帝每稱瞻有三術射碁酒及卒謚康侯
子長元早卒瞻從子籍字文海父僧祐齊太子中舍人
僧祐附其從祖弟太尉儉傳列在齊史籍始仕為餘杭
令政化如神善於摘服自下莫能欺也俄為百姓所訟
轉錢唐令下車布政咸謂數十年來未之有也籍好學

有才氣為詩慕謝靈運至其合也殆無愧色時人咸謂
康樂之有王籍如仲尼之有邱明老聃之有莊周天監
中為輕車湘東王諮議參軍隨府會稽郡至若邪溪賦
詩云蟬噪林逾靜鳥鳴山更幽劉摛見之擊節不能已
已以公事免及為中散大夫彌忽忽不樂乃至徒行市
道不擇交遊有時塗中見相識輒以笠傘覆面後為作
唐侯相小邑窮僻彌不樂不理縣事人有訟者鞭而遣
之未幾而卒籍甚工草書筆勢邁放蓋孔琳之流亞也

湘東人士集其文為十卷云

王瑩字奉光琅邪臨沂人也晉中軍將軍恬之後父懋
字昌業宋光祿大夫封南鄉侯瑩選尚宋臨淮公主拜
駙馬都尉累遷義興太守代謝超宗超宗去郡與瑩交
惡還都就懋求書屬瑩求一吏曰丈人一旨如湯澆雪
耳及至瑩答旨以公吏不可超宗往懋處對諸賓謂懋
曰湯定不可澆雪懋面洞赤唯大恥愧懋後往超宗處
設精白鮓美鮓麇臠懋問那得此味超宗詭言義興始

見餉陽驚曰丈人豈應不得邪懋大忿言於朝廷稱瑩
供養不足坐失郡廢棄久之後歷侍中東陽太守以居
郡有惠政遷吳興太守齊明帝勤憂庶政瑩頻處二郡
皆有能名還為中領軍隨王長史意不平改為太子詹
事中領軍永元初政由羣小瑩守職而已不能有所是
非及尚書令徐孝嗣誅瑩頗綜朝政啟取孝嗣所居宅
及取孝嗣封名枝江縣侯以為己封從弟亮謂曰此非
盛德也瑩怒曰我昔從東度為吳興東身登岸徐時為

宰相不能見知相用為領軍長史今住其它差無多慚
時人咸謂失德亮既當朝於瑩素雖不善時欲引與同
事遷尚書左僕射未拜會護軍崔慧景自京口奉江夏
王內向瑩拒慧景於湖頭眾敗瑩赴水乘舫入樂遊因
得還臺城慧景敗瑩還居領軍府武帝兵至復假節都
督宮城諸軍事建康平瑩乃以宅還徐氏初為武帝相
國左長史及踐阼封建城縣公累遷尚書令瑩性清慎
帝深善之時有虎入郭上意不悅以問羣臣羣臣莫對

瑩在御筵乃斂版答曰帝舜擊石拊石百獸率舞陛下
膺錄御圖虎象來格帝大悅衆咸服焉十五年位左光
祿大夫開府儀同三司丹陽尹既為公須開黃閣宅前
促欲買南隣朱侃半宅侃懼見侵貨得錢百萬瑩乃回
閣向東時人為之語曰欲向南錢可貪遂向東為黃銅
及將拜印工鑄印六鑄而龜六毀及成頭空不實補而
用之居職六日暴疾薨謚曰靜恭少子實嗣起家祕書
郎尚武帝女安吉公主襲爵建城縣公為新安太守實

從兄來郡就求告實與銅錢五十萬不聽於郡及道散
用從兄密於郡市貨還都求利及去郡數十里實乃知
命追之呼從兄上岸盤頭令卒與杖搏頰從兄乞原劣
得免後為南康嗣王湘州長史長沙郡以三月三日出
糗實衣冠傾崎王性方嚴見之意殊惡實稱主上謂王
曰蕭王誌念實殿下何見憎王驚赧即起後密啟之因
此禁錮瑩從父弟亮字奉叔父攸字昌達仕宋位太宰
中郎贈給事黃門侍郎亮以名家宋末選尚公主拜駙

馬都尉歷任祕書丞齊竟陵王子良開西邸延才俊以
為士林使工圖其像亮亦豫焉累遷晉陵太守在職清
公有美政時有晉陵令沈嶺之性粗踈好犯亮諱亮不
悅遂啟代之嶺之怏怏乃進坐云下官以犯諱被代未
知明府諱若為攸字當作無骹尊傍犬為大傍無骹尊
若是有心攸無心攸乞告示亮不履下牀跣而走嶺之
撫掌大笑而去建武末累遷吏部尚書時右僕射江柘
管朝政多所進拔為士所歸亮自以身居選部每持異

議始亮未為吏部郎時以拓帝之內弟故深友拓拓為之延譽益為帝所器重至是與拓情好攜薄拓昵之如初及拓遇誅羣小放命凡所除拜悉由內降亮弗能止外若詳審內無明鑒所選用拘資次而已當時不謂為能後為尚書左僕射及東昏肆虐亮取容以免武帝至新林內外百僚皆道迎其不能拔者亦間路送誠款亮獨不遣及東昏遇弒張稷仍集亮等於太極殿前西鐘下坐議欲立齊相東嗣王寶暉領軍瑩曰城閉已久人

情離解征東在近何不諮問張稷又曰桀有昏德禹遷
于殷今實微子去殷項伯歸漢之日亮默然朝士相次
下牀乃遣國子博士范雲齋東昏首送石頭推亮為首
城平朝士畢至亮獨後羣履見武帝帝謂曰顛而不扶
安用彼相亮曰若其可扶明公豈有今日之舉因泣而
去霸府開以為大司馬長史梁臺建授侍中尚書令固
讓乃為侍中中書監兼尚書令及受禪遷侍中尚書令
中軍將軍封豫寧縣公天監二年轉光祿大夫元日朝

會亮辭疾不登殿設饌別省語笑自若數日詔公卿問
訊亮無病色御史中丞樂藹奏亮大不敬論棄市詔削
爵廢為庶人四年帝宴華光殿求讜言尚書左丞范縝
起曰司徒謝朏本有虛名陛下擢之如此前尚書令王
亮頗有政體陛下棄之如彼愚臣所不知帝變色曰卿
可更餘言縝固執不已帝不悅御史中丞任昉因奏縝
妄陳褻貶請免縝官詔可亮因屏居閉埽不通賓客遭
母憂居喪盡禮後為中書監加散騎常侍卒謚煬子

王進之琅邪臨沂人晉尚書僕射彬之後也祖准之宋丹陽尹自有傳父輿之征虜主簿進之仕齊位給事黃門侍郎扶風太守武帝之舉兵也所在響應隣郡多請進之同遣修謁進之曰非吾志也竟不行武帝嘉之梁臺建歷尚書左丞廣平天門二郡太守左衛將軍封建寧公進之子清位散騎常侍金紫光祿大夫鎮東府長史新野東陽二郡太守安南將軍封中盧公承聖末陳武帝殺太尉王僧辯遣兄子蒨攻僧辯壻杜龕龕告難

於清清往援龕大敗禧於吳興追奔至晉陵時廣州刺史歐陽頎亦同清援龕中更改異殺清而歸武帝清子猛歷陳入隋位開府儀同三司列在陳史

王份字季文琅邪臨沂人晉丞相導之後宋中書監常侍僕射揚州刺史或之兄子也父粹字景深位黃門侍郎份始仕宋位始安內史袁粲之誅親故無敢視者份獨往致慟由是顯名累遷大司農份兄真齊雍州刺史永明末於州舉兵拒命事敗被害事具真本傳真誅後

其子肅奔魏份自拘請罪齊武帝宥之肅屢引魏人至邊份嘗因侍坐武帝謂曰比有北信不份改容對曰肅既近忘墳栢寧遠憶有臣帝亦以此亮焉後位秘書監仕梁位散騎常侍領步兵校尉兼起部尚書武帝嘗於宴席問羣臣曰朕為有為無份曰陛下應萬物為有體至理為無帝稱善後累遷尚書左僕射歷侍中特進左光祿大夫監丹陽尹卒謚曰胡子長子琳字孝璋位司徒左長史琳齊代取武帝妹義興長公主有子九人並


知名長子銓字公衡美風儀善占吐尚武帝女永嘉公主拜駙馬都尉銓雖學業不及弟錫而孝行齊焉時人以為銓錫二王可謂玉昆金友母長公主疾銓形貌瘠毀人不復識及居喪哭泣無常因得氣疾位侍中丹陽尹卒於衛尉卿子溥字伯淮尚簡文帝女餘姚公主錫字公嘏幼警悟與兄弟受業至應休散輒獨留不起精力不倦致損右目十二為國子生十四舉清茂除秘書郎再遷太子洗馬時昭明太子尚幼武帝勅錫與秘書

郎張纘使入宮不限日數與太子游狎情兼師友又勅陸倕張率謝舉王規王筠劉孝綽到洽張緬為學士十人盡一時之選錫以戚屬封永安侯普通初魏始連和使劉善明來聘勅中書舍人朱异接之善明彭城舊友氣調甚高負其才氣酒酣謂异曰南國辨學如中書者幾人异曰异所以得接賓宴乃分職是司若以才辯相尚則不容見使善明乃曰王錫張纘北間所聞云何可見异具啟聞勅即使南苑設宴錫與張纘朱异四人而

已善明造席徧論經史無以嘲詎錫纘隨方酬對無所
稽疑善明甚相嘆挹他日謂异曰一日見二賢實副所
期不有君子安能為國引宴之日勅使左右徐僧權於
坐後言則書之累遷吏部郎中時年二十四謂親友曰
吾以外戚謬被時知無比羸病庶務雜擁安能捨其所
好而徇其不能乃稱疾不拜便謝遣胥徒拒絕賓客掩
扉覃思室宇蕭然諸子溫清隔簾趨倚公主乃命穿壁
使子涉澁觀之卒年三十六贈侍中謚曰貞子錫弟僉

字公會八歲丁父憂哀毀過禮初補國子生祭酒袁昂稱為通理累遷始興內史丁所生母憂固辭不拜又除南康內史在郡義興主薨詔起復郡後為太子中庶子掌東宮管記卒贈侍中元帝詔賢而不伐曰恭追謚曰恭子份從孫克或之曾孫也祖續齊太常父儁不慧位止建安太守克美容貌善容止歷位司徒右長史尚書僕射臺城陷仕侯景為太宰侍中錄尚書事景敗克迎候王僧辯僧辯問克曰勞事夷狄之君克不能對次問

璽紱何在克默然良久曰趙平原將去平原名思賢景腹心也景授平原太守故克呼焉僧辯乃謂克曰王氏百世卿族便是一朝而墜克後仕陳位尚書右僕射份弟通勵列在陳史



通志卷一百四十